



Uunga: Ruth Heilmann

§ 37 naapertorlugu apeqquteqaammut akissuteqaat
Asasara Ruth Heilmann,

28. nov 2011
Sagsnr. 2011-058435
Dok. Nr. 770010

Qujanaq apeqquteqaatinnut tulliuuttunut akineqartunut:

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanoq.gl
www.nanoq.gl

1. Sooruna Naalakkersuisut UKA 2009-mi misissueqqissaarnisamik malitseqartitsiniarlutik aammalu UPA 2010-mi inatsisartunut iliuserisassamik pilersaarutiminnik saqqummiussaqaarniarlutik neriorsuinertik maanamut ukiuni pingasunnugulersuni sulii eqqortissimangilaat?

Inuussutissarsiornermut Suliffeqarnermullu Naalakkersuisoqarfik suleqatigiissitamik pilersitsivoq, suleqatigiissitarlu aamma aqupparput. Isumaginninnermi Naammagittaalliuuteqartarfiup saniatigut Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik aamma peqataavoq. Suliat sivoqisumik suliarineqartarnerisa sivikillineqarnissaannut aaqiissutissatut tapertaasinnaasunik nassaarnissaq suleqatigiissitamut siunertaavoq. Tamanna inatsisilerinikkut annertuumik unamminartuuvoq, inatsisit assigiinngiiaartut eqqortinneqarnissaat ilaagami. Unamminartopassuit ilagaat suliap suliarineqarnerata sivikillineqarnissaa (naammassisaqarsinnaassuseq) – illuatungaatigulli naammagittaalliuuteqartup inatsisitigut eqqortumik pineqarnissaanut qulakkeerinninnerit qasukarneqassanatik.

Allatut oqaatigalugu: Inatsisilerinnermi ajornartorsiut nalinginnaasumik nalaatassaajuartartuq, tassalu illuatungeriit akerleriittut soqutigisaasa qulakkeerneqarnissaat. Taamatut inneratigut suliat inernissaqanngipajaartut ittuq qanoq aaqiivigineqarsinnaanerannut paasiniagassat amerlaneruleqqittarput.

Annertuumik qulaajaanerup sivitsuunneqarneranut tamanna pissutaaqataavoq – ajorluartumillu suliaq sulii naammassivinngilaq. Pineqartorli pillugu 2012-ip ingerlanerani erseqqinnerusumik paasissutissaateqalernissaq suleqatigiissitap erseqqissumik anguniagaraa. Inatsisitigut allannguisoqarnissaanik pisariaqartitsisoqalissappat, tamatuma malitsigisaanik taakku suliarineqassapput.

2. UKA 2009-mi Naalakkersuisut UKA 2010-mut inatsisissamik saqqummiussaqaarniarlutik neriorsuutertik sulii piviusunnngortinngikkaat, sooruna?

Apeqqutip 1-p ataani akissuteqaat takuuk.

3. Isumaginninnermik Naammagittaalliuuteqarfiup ukiumoortumik nalunaarutaa qaqugu takoqqissavarput?

Isumaginninnermi Naammagittaalliuuteqartarfiup qarasaasiakkut quppersagaata maanna naleqqussarneqarneranut atatillugu ukiumoortumik nalunaarutit qarasaasiakkut quppersakkamut inissinneqassapput. 2009-mut 2010-mullu ukiumoortumik nalunaarutit maanna suliarineqarput, 2012-illu allartinnerani qarasaasiakkut quppersakkamut inissinneqarnissaat naatsorsuutigineqarluni.

4. 2009-mi ukiakkut nassuiaatip suliarineqareernerani qanoq alloriartoqarpa. Sulisut inatsisilerituullu qassinik amerlippat, aammalu naammagittaalliutinik suliaqarneq qangarnit eqaannerulerpa qassinillu ikileriaateqartoqarpa?

Sulianik suliarinninneq naammassisaqarfiunerulersinniarlugu Isumaginninnermi Naammagittaalliuuteqartarfiup allattoqarfia ukiut kingullerpaat ingerlanerini sulianik suliarinnearnaatsimini arlaqartunik allannguivoq:

1. Kommunit aalajangiineri, imaluunniit kommunip suliamik suliarinninneri inatsisitigut piumasaqaatit naapertorlugit pisimangippata, naammagittaalliutitut suliat kommuninut uterteqqinneqartarput, sapinngisamik sukkanerpaamik suliareqqeqqullugit.
2. Maanna suliat amerlanerusut naammagittaalliuuteqartarfiup ataatsimiinnerini suliarineqaratik siulittaasumit aalajangiiffigineqarlutik suliarineqartarput.
3. Isumaginninnermi Naammagittaalliuuteqartarfiup allattoqarfiani suliamik suliarinninnerit tamarmik maanna qarasaasiakkut ingerlanneqarput.

Allattoqarfimmi inatsisilerituut pingasut atorfeqartinneqarput, sulisullu attatiinnarneqarnissaat sulissutigineqarsimalluni. Taamaattumik agguaqatigiissillugu qanoq sivisutigitsumik atorfeqartarneq ukiut kingullerpaat ingerlanerini sivitsorsimavoq.

2008-mi ukiakkut allattoqarfimmi suliat 800-t missaat ingerlanneqarput, maannakkullu 230-t missaanniillutik.

Suliamik suliarinninnermut piffissaq agguaqatigiissillugu atorneqartartoq 2008-mi ukiut marluk sinnerlugit sivisussuseqarpoq, maannakkullu agguaqatigiissillugu qaammatit qulit missaannik sivisussuseqarluni.

Isumaginninnermi Naammagittaalliuuteqartarfik 2008-mi sulianik 410-nik tigusaqarpoq. Isumaginninnermi Naammagittaalliuuteqartarfik 2011-mi ullumikkumut sulianik naammagittaalliutinik 216-inik tigusaqareerpoq, naatsorsuutigalugulu 2011-mi suliat katillugit 250-t missaanniikkumaartut. Isumaginninnermi Naammagittaalliuuteqartarfiup 2011-mi septembarip naanera tikillugu suliat 215-it naammassivai, suliallu katillugit 280-it missaasa 2011-mi naammassineqarnissaat naatsorsuutigalugu. Taamaattumik Isumaginninnermi Naammagittaalliuuteqartarfimmi suliamik suliarinninnerup sivikilliniarneranik suliaqarneq sulii siumut ingerlavoq.

5. Allaffissornikkut aningaasartuuteqarneq qanoq annertusiva?

Isumaginninnermi Naammagittaalliuuteqartarfik Siunnersuisoqatigiinnut Aalajangiisartunullu Aqutsisoqarfimmut 2008-mi nuutinneqarmalli akuersissutit taamaallaat aningaasat nalingisa allanngoriartornerat naapertorlugi tulluarsagaasarput. Isumaginninnermi Naammagittaalliuuteqartarfimmut 2011-mut missingersuutit 2.041.000 kr.-nik annertussuseqarput.

6. Naammagittaalliuutinik sullissineq pillugit Kommuninut Namminersorlutik Oqartussat pikkorissaanernik ingerlatsisarnerat suli atuuppa? Taa-maanngippat qaqugu pilersaarutaava?

Ilaqtariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik isumaginninnermik suliaqarfiusumi ilinniartitsinissamut pisussaaffeqarpoq. Aammattaaq Isumaginninnermi Naammagittaalliuuteqartarfiup allattoqarfia pikkorissaanernik kommunit kissaatigisaat atorfissaqartitaallu naapertorlugit tulluarsagaasinnaasunik neqerooruteqartarpoq. Ilinniartitsineq namminermi ilinniartitsinermilu atortut kommuninut akeqanngillat, ilinniartitsisulli angalanerat, nerisaqartitaanerat najugaqartitaanerallu kommunit aningaasartuutigisussaavaat, soorlu aamma kommunit oqalutseqartitsisussaasut.

Isumaginninnermi Naammagittaalliuuteqartarfiup allattoqarfia pisortanit ikiorsiissutinut tunngasunik Kommuneqarfik Sermersuumi ilinniartitsinikuvoq.

Oqaatsunut, Ilulissanut, Upernavimmut sapaatillu akunnerani matumani Tasiilamut tikeararnerni kommunini sulisut paasissutissiinertalimmik ataatsimeeqatigineqartarput. Aammattaaq Ilulissani Upernavimmilu politiini eqqartuussivinnilu sulisut paasissutissiinertalinnik ataatsimeeqatigineqarput.

Tamatuma saniatigut suliat tunngaviusumik aallaavigineqartussatut isigineqartut kiisalu suleriaatsimut suliamillu suliarinninnermut tunngasunik paasissutissat annikinnerusut Isumaginninnermi Naammagittaalliuuteqartarfiup allattoqarfiata kommuninut ataavartumik nassiussuuttarpei.

7. Innuttaasut atuisullu qanoq paasissutissinneqartigisarpat?

Isumaginninnermi Naammagittaalliuuteqartarfiup taassumalu allattoqarfiata qarasaasiakkut quppersakkami/innuttaasunik sullissivimmi www.sullissivik.gl-imi aammattaaq Isumaginninnermi Naammagittaalliuuteqartarfiup namminerisaminik qarasaasiakkut quppersagaani paasissutissat ataavartumik tulluarsartarpat.

Ilulissanut Upernavimmullu tikeraarnerup nalaani kikkunnut tamanut ammasumik innuttaasut ataatsimiisinneqarput. Ataatsimiisitsinerit najukkami radiokkut allagarsiivinnilu allagartaliinikkut nalunaarutigineqarput.

8. Ullumikkut naammagittaalliuutit suliarineqanngitsut qassit utaqqisinneqarpat?

Isumaginninnermi Naammagittaalliuuteqartarfik/Isumaginninnermi Naammagittaalliuuteqartarfiup allattoqarfia sulianik suliarineqanngitsunik suliassaateqanngilaq. Maanna suliat 230-t missaasa suliarineqarnerat ingerlavoq.

9. Kommunerejussuanngortitsinerup kingorna naammagittaalliuutit qanoq misigisaqarfiuppat innuttaasut naammagittaalliuuteqartut eqqarsaatigalugit pisariinnerulertoqarpa imaluunniit qanoq ingerlasoqalarpa?

Kommunerujussuannngortitsinnermut atatillugu Isumaginninnermi Naammagittaalliuuteqartarfiup allattoqarfia nalunaarfigineqarpoq, kommuninik allaffigeqatigiinnerit tamarmik nalunaarsorneqarnissaat allattaavinnullu allattorneqarnissaat eqqarsaatigalugit qitiusumik allaffeqarfinnut ingerlatinneqartassasut. Tamatuma kinguneranik suliat suliarineqartarnerat amerlasoorpassuartigut kinguaattoorfiusarpoq, qitiusumik allaffeqarfiit amerlanertigut illoqarfiit nunaqarfiillu allaffeqarfiinut attaveqarnissamut piffissarujussuaq ator-tarmassuk, assersuutigalugu paasissutissat suliamut tunngasut taakkunanga pineqartussaammata. Suliat nalinginnaasumik paasissutissanik inunnut annertuumik mianernarsinnaasunik imaqarajuttarmata, qarasaasiakkut allaffigeqatigiittarneq qaqutiguinnaq atorneqarsinnaasarpoq. Isumaginninnermi Naammagittaalliuuteqartarfiup allattoqarfiata qitiusumik allaffeqarfinnut aamma illoqarfiup/nunaqarfiup allaffeqarfianut ataatsikkoortumik fax atorlugu allagaqartarnermigut ajornartorsiut tamanna pitsaaliorniarsaraa.

10. Ullumikkut naammagittaalliuutaasartut sumut sammitinneqarneruppat?

Isumaginninnermi Naammagittaalliuuteqartarfik isumaginninnermik suliaqarfiusumi sulianut assigiinngitsunut tamarluinnangajannut tunngasunik naammagittaalliuutinik tigusaqartarpoq. Naammagittaalliuutit amerlanersaat pisortat ikiorsiissutaannut aamma utoqqalinersiutinut kiisalu siusinaartumik soraarnerussutisianut tunngasuupput, tamanalu siumungaaq naatsorsuutigineqarsinnaareerpoq pissusissamisoorlunilu.

Isumaginninnermi Naammagittaalliuuteqartarfik innarluutilinnik sullissinnermut, tassalu inunnik annertuumik innarluuteqartunik ikiorsiinnermut tunngasunik naammagittaalliuutinik amerlangaatsiartunik siusinnerusukkut tigusaqartarsimavoq. Suliani taamatut ittuni aalajangiisinaanermut piginnaatitsissut 1. januar 2011-mi Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfimmiit kommuninut nuunneqarmalli, suliani aalajangersimasuni suliat sivisuumik suliarineqaraluartut kommunip ataatsip suli aalajangiisimannginnera pillugu naammagittaalliuutit marluk eqqaasannngikkaanni, Isumaginninnermi Naammagittaalliuuteqartarfik suliaqarfiusumut tunngasunik naammagittaalliuutinik tigusaqanngilaq.

Isumaginninnermi Naammagittaalliuuteqartarfiup tamanna ernumanartutut isigaa, taamaattumillu Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik kiisalu KANUKOKA ajornartorsiut pillugu ilisimatillugit.

Inussiarnersumik inuulluaqqusillunga



Ove Karl Berthelsen

Inuussutissarsiornermut Aatsitassarsiornermullu Naalakkersuisoq